



AWIG – AWIG DESA ADAT BANGAH MURDHA WAKYA

Sangkaning pasuwecan Hyang Widhi Wasa, mungging paruman Desa Adat Bangah, duk rahina Redite, waku Pahang, pinanggal 22 Maret 2020, ngewentenang darma tula, tur ngemanggehang wenten pararem Krama Adat, sane nyangkepin tetrapan daging awig-awig desa adat maka sidaning don kepangguh tatejon mawa desa, sekadi sane menggah ring murdha wakya awig-awig Adat Bangah.

Pararem puniki, mangda sida maweh patitis sejroning usaha/laksana Desa Adat Bangah ngulati sukerta mawa desa. Maka larapan ngulati punika, pastika mabuat pisan wentene pamutus paruman karma adat, wentene katetapan ngardi Pararem Desa Adat Bangah sane nuntun Krama Desa Adat nyikiang asih, punia, kalawan baktine mepekraman medasar pancasila lan undang-undang dasar 1945, lan sastra agama Hindu.

Kandugi paruman Krama Desa Adat Bangah netepang saha mamutus. Ngardi pararem Desa Adat Bangah saha pepalihannya, kadudonan ring sor puniki:

PRATAMA SARGA
WAWENGKON LAN TATRAPAN

PAWOS 1
WAWENGKON

1. Wawengkon pararem Desa Adat Bangah puniki,
HA. Banjar Adat Bangah
NA. Banjar Adat Abianluang

PAWOS 2.
TATRAPAN

Tatrapan pararem Desa Adat Bangah puniki, ngrangkul kakuwub Desa Adat Bangah kelaksayang ring kramane ring banjar-banjar selanturnya mekadi:
HA. Banjar Adat Bangah
NA. Banjar Adat Abialuang

DWTYA SARGA
PETITIS LAN PAMIKUKUH
PAWOS 3

DESA ADAT BANGAH NGEMANGGEHANG PAMIKUKUH MINAKADI:

- HA. Pancasila
- NA. UUD 1945 pamekas pasal 18
- CA. Tri hita Karana manut sada cara agama Hindu
- RA. Perda no. 6 th. 1986 tentang kedudukan fungsi prana Desa Adat sebagai kesatuan masyarakat dalam Provinsi Bali

PAWOS 4

LUIR PETITIS DESA ADAT BANGAH

- HA. Mikukuhin miah ngerajegan sanghyang agama
- NA. Nginggilang tata praweti meagama
- CA. Ngerajegang kasukertan desa adat saha pawongannya sekala lawan niskala.

TRIYAS SARGA
SUKERTA TATA PEKRAMAN
PALET 1
INDIK KRAMA

PAWOS 5, 6, 7, 8, 9, 10

1. Sane kebaos karma Desa Adat Bangah inggih punika
 - HA. Krama sane me agama Hindu
 - NA. Madue karang paumahan sane mawit saking ngewaris, utawi mawit saking numbas.
 - CA. Silih sinunggil karma tiosan ring karma Desa Adat Bangah madue tanah, karang peumahan wenang tedun langkung ring pekarangannya jenek wenang tedun mekrama Adat Bangah.
2. Sang sane ayat jagi ngeranjing mekrama Desa Adat Bangah kasulurang, tios ring panyujug keni:
 - HA. Pananjung batu akehnya sepengargan beras 5 kwintal, kangkat ketaur ping tiga, suwenia 6 sasih ngawit tedun mekrama Desa Adat.
 - NA. Ngaturan upekara, pakeling ring tri kahyangan antuk upekara daksina pejati keenter oleh pemangku suang-suang kesaksi oleh prajuru utawi bendesa adat.
 - CA. Makta surat keterangan (suwala patra) indik kesah saking genah ngawit (nguni)
 - RA. Sang ayat jagi ngeranjing mekrama desa adat kewehin magenah olih Bendesa Adat ring sinalih tunggil banjar sane kekuwub/wewidangan olih Desa Adat Bangah.
 - KA. Krama sane metilar lan ngeranjing malih ke Desa Adat Bangah keni 3 kwintal (prebeya wewangunan) beras kelas II antuk jinah penanjung batu.
 - DA. Krama sane transmigrasi tan keni penanjung batu taler prebeya wewangunan.
3. Sang karma sane jagi ayat ngeranjing mekrama Desa Adat tan setinut kadi ring ajeng kesulurung.
 - HA. Tan ketrima/ketampi mekrama Desa Adat Bangah

NA. Sang inucap tan kesanggra sahananing perbuatan suka, duka, lara, pati olih Krama Desa Adat.

CA. Desa Adat tan maweh pesayuban indik tata karma medesa adat.

4. Sejaba punika sinanggeh tamiu

HA. Sane sinanggeh tamiu sane ngereh pangupajiwa sane suwe asasih utawi langkung keni dana penyanggra Rp. 20.000 adiri (krama Bali) lan Rp 50.000 adiri (krama luar Bali)

NA. Sane sinanggeh tamiu sane ngerereh pangupajiwa masuwe tigang rahina angatos asasih keni dana penyanggra Rp. 20.000 adiri (krama Bali) lan Rp 50.000 adiri (krama luar Bali)

CA. Sang sinenggeh tamiu patut nyangkepin surat keterangan/kipem kartu tanda penduduk saking genahnya rihin.

RA. Sekancan tamiu yan tan tinut utawi piwal sekadi ring ajeng (Ha, Na, Ca,) Desa Adat wenang nundung.

KA. Sang krama ngajak tamiu sama kuta ring sang tamiu punika keni penyanggre Rp.20.000 adiri (krama Bali) lan Rp 50.000 adiri (krama luar Bali).

DA. Sang karma sane ngajak tamiu mangda atur supeksa ring kelian adat/dulu desa soang-soang kirang langkung arahina (24 jam).

PAWOS 6

Ngawit dados karma Desa aAdat Bangah kesulurang:

HA. Sangkaning madruwe/ngamong karang paumahan sane mawiwit saking ngwaris utawi numbas.

NA. Mawit saking panemaya/majugjug

CA. Mawit saking numbas

RA. Sane mawit saking piteges 6 sasih ring aksara (nga) ring ajeng.

PAWOS 7

Panemaya tedun mekrama Desa Adat:

HA. Nyabran sasih kesanga tinas

NA. Nyantos 6 sasih mawit pawiwahan/upakara pebio kaonan

CA. Dados nyabit ayah sane mekrama Banjar Gede utawi ayah pengele asiki.

PAWOS 8

Sahanan karma Desa Adat sami keni tetegenan:

1. Ayah nyumek mapiteges urunan miwah ayah mamungkul.
2. Indik dedosan/bebaktan, sesalahan, kesuluran manut:
 - HA. Salah tan nedunin paruman Desa Adat/Banjar keni danda Rp. 10.000
 - NA. Salah tan tedun ngayah keni danda Rp. 10.000
 - CA. Sang mayusa 17 th. Wara kengin ngewakilin sinalih tunggil krama sane metilar tan mesadok ring prajuru, dulu Desa Adat sedereng puput karya, parum wenang krama inucap keni danda Rp. 20.000
 - RA. Prade rikalaning paruman utawi ngayah wenten sinalih tunggil krama sane metilar tan mesadok ring prajuru, dulu desa adat sederang puput karya, parum, wenang krama inucap keni danda Rp. 20.000
 - KA. Dana, arta, sesalahan ring aksara (HA,NA,CA,RA) kerajinan dados druwen Desa Adat.
 - DA. Yan mepel Rp. 10.000
3. Indik urunan lan leluputan kesuluran manut:
 - HA. Sang inggilan linggih pemangku luput peturunan kalaning odalan lan wewangunan, Prajuru luput pepesuan ring amongan sowang-sowang.
 - NA. Sang sulinggih (pedanda, resi, empu, mangku luput peturunan) ring amongan.
 - CA. Para dasaran, para dukuh, sane manggeh para prewalen desa adat sane sampun kesaksi olih prajuru lan Krama Banjar, dulu desa luput ayah-ayah duka.
 - RA. Ring sang kawelas asih, ceda angga sane abot pisan luput ayah-ayah
 - KA. Sekaa gong padruwen desa adat luput ayah-ayah, ririgan, kasinoman lan pekemitan.
 - DA. Sekaa baris padruwen desa adat luput ayah-ayah, ririgan, kasinoman lan pekemitan.
 - TA. Prajuru luput ayah-ayah, ririgan, kasinoman lan pekemitan.
3. Nunggak urunan lan sesalahan kesulurang manut
 - HA. Sang nunggak urunan sesalahan polih tempo 3 rahina
 - NA. Urunan punika ketaur galah ngawit pekerab ngemargiang odalan ngawit mereresik lan pengeluaran piodalan.

CA. Yan ngelantur tan kataur tungkasin pematut Desa Adat sang tungkas
(kenorayang) dobel utawi nikel.

RA. Desa Adat tan maweh pesayuban ritepengan suka, duka, lara, pati.

KA. Yan langkung telas tempo tan nawur sang inucap keni nikel (kadobel)
sane katunggakan tan polih tempo malih.

DA. Bendesa adat patut atur supeksa majeng Krama Desa Adat indik aksara
(CA, RA).

PAWOS 9

I. Krama desa adat kedadosan mapuangkid utawi tan tedun:

1. Rikala mepewangunan

- Genah suci, panti, merajan, tugu karang

HA. Yan nayung (ngewangun anyar) merajan polih asasih

NA. Yang nayung polih luputan ngantos upakara penguluran

2. Ngelaksanayang yadnya:

HA. Dewa yadnya melaspas, ngelinggihan polih 35 rahina

NA. Ngerainin (piodalan alit) polih 3 rahina

CA. Mecaru eka sata 1 rahina

RA. Mecaru manca sata 3 rahina

KA. Manusa yadnya polih manut suka duka

3. Mapatepetin (kaluasan) polih 3 rahina

4. Pengayah sane sampun mayusa 70 (pitung Dasa) tiban lan ten medue penyeledi kabawos nyada, lan sane madue penyeledi tan dados ngayahang wajib (kasabit)

5. Nyada utawi nyucukin risampun menggah deha/teruna mayusa 17 warsa utawi sampun naenin merabian.

II. Nutug ayah-ayah antuk arta, brana, kesulurang:

1. Krama Desa Adat Bangah kedadosan numbas ayah-ayah sane megenah ring luar Kecamatan Baturiti, batas naur ayah-ayah ritat kala Nyepi.

2. Pegawai Negeri/karyawan sane mekarya ring sewewengkon Desa Adat Bangah nanging magenah ring adat Bangah (ngontrak) kani jinah penyanggra awarsa akehne 30 kg beras kelas II (nemu sasih kesanga)

3. Krama sane doh genah ngerereh pangpajiwa ke dadosan numbas ayah-ayah keni dana arta sepengargan beras 30 kg beras kelas II

4. Numbas (mopog) ayah-ayah antuk arta brana ke tawur nyabran sasih kesanga

5. Ring sang sane numbas ayah-ayah (mopog) taler keni urunan lan pepesuan kadi krama tiyosan.
6. Ring sang sane numbas ayah-ayah rikala desane ngewangun desa adat, kengin medana punia manut keseresan kayun sapunika taler ring krama tiosan.
7. Dana arta kramane sane numbas (mopog) ayah-ayah keranjingan ring duwe desa adat.
8. Kerama sane ngowot ritatkala kematian tan dados ngewot ayah-ayah patut sareng tedun ritatkala pengutangan
9. Pelinggih sane dados ke wotan inggih punika
 - Ring pelinggih puseh : Beras kelas II = 30 kg / tahun
 - Ring Pura Melanting : Beras kelas II = 30 kg / tahun
 - Ring Pura Dalem : Beras kelas II = 30 kg / tahun
 - Ring Jero Gede (Tapakan) : Beras kelas II = 40 kg / tahun

PAWOS 10

WUSAN DADOS KRAMA DESA ADAT LUIRE

1. Sangkaning pinunas ngeraga
 - Sang sane wusan mekrama adat sangkaning pinunas ngeraga, wit megingsir genah jenek kesulurang:
 HA. Sang inucap tan polih pah pahan pedruwen desa adat
 NA. Sang inucap namur nguntasang sakeliur tetegenan/tunggakan ring desa adat.
 CA. Prade sang inucap mewali malih mekrama desa adat keni penanjung
 3 (tiga) kwintal beras kelas I
2. Sangkaning kenorayang

Wusan mekrama desa adat wit kenorayang piwal ring sesulur uger-uger/awig-awig desa adat kesulurang.

HA. Piwal, nyapian keni pakeling ring indik piwalnya mangda kayun nyupat, mpesehin keiwangan.

NA. Yan kukuh, para tingkahe keni penglemek prajuru, saha keni danda arta nikel (dobel).

CA. Di ping tigane katun kukuh sang inucap tan kesanggra (keundukang) sakabuatan suka, duka, lara pati, olih krama adat.

RA. Sang inucap kenorayang tan polih pesayuban olih desa adat.

KA. Yan sang inucap kenorayang tan polih pesayuban olih desa adat niwakang
wewenang ring bendesa/ dulu desa adat kepikukuh olih krama.

DA. Ngenorayang keatur upeksa ring guru wisesa mejalaran dulu dines.

TA. Sang inucap kenorayang tan polih pahpahan druwen desa adat.

PALET 2

PRAJURU/DULU DESA ADAT

PAWOS 11,12,13,14,15

1. Desa Adat Bangah keenter antuk Bendesa adat
2. Banjar utawi Banjar adat keenter antuk kelian adat
3. Bedesa adat lan kelian adat lan seperangkatnya patut
HA. Mawiwit saking krama adat
NA. Keadegan melarapan antuk pemilihan olih paruman krama soang-soang adat.
RA. Maduluran upesaksi ring pura desa, ri tepengan gilik seguluk desa adat kelaksanayang olih krama desa adat.

PAWOS 12

1. Bendesa adat kewantu antuk:
HA. Pangliman
NA. Petengen
CA. Baga Bendesa Adat
2. Kelian adat kewantu antuk:
HA. Petajuh wakil kelian adat
NA. Petengen Pinaka pengemong druwe banjar adat
CA. Prajuru Pengempon kayangan pura setios Tri Kayangan
3. Sejroning ngenterang kesukertan niskala bendesa adat patut misinggihan pemangku kayangan desa Pekraman.
4. Bacakan prajuru luire:
HA. Bendesa adat, kelian adat lan seprangkatnya
NA. Kelian pengemong (pengempon) pura, tapakan
CA. Pemangku, Kayangan tiga, pemangku Dang Kayangan lan seprangkatnya
RA. Kelian Dinas, BPD, LPM, lan seperangkatnya

PAWOS 13

Swadarmaning bendesa adat luire:

1. Patiwak dedosan ring prajuru/dulu desa yening prajuru dulu desa timpal ring swadarmaning prajuru sekadi sane munggah ring awig-awig Desa Adat Bangah kasulurang:
 - HA. Yan tan jantos ngawinan kabiyaparan krama adat arta lan agama patut nyupat kaiwangan ring krama desa adat.
 - NA. Yan jantos ngawinang biyapara krama adat arta lan agama katiwakin kasisipan antuk ngewaliang arta ngaksama lan dewa danda upekara manut unjuk lungsuri kasisipanne senistane prascita, guru piduka, sejroning asasih
 - CA. Yan prajuru sentinut keni patiwak kesisipan, nanging tan tinut ring sasengker prajuru keni penekel penaur kesisipan arta kemaon Eka Sata (Panca Sata)
 - RA. Yan tan ketaur kadi inucap ring aksara Ca, tur sampun kepekelingin oleh krama. Kramane ngewusan madeg prajuru tur ngaskara kerujagen manut (semaya)
 - KA. Sang inucap ke aturuningan ring guru wisesa tur sedurung pastika puput wicara inucap, sang inucap tan kesanggra oleh krama adat kebuat, suka, duka, lara, pati.
 - DA. Selami kenorayang sang inucap tan kewenangan sahana druwen desa adat sekadi krama biasa.
 - a. Nanem sawa ring setra
 - b. Ngangge kayangan genah mebakti
 - TA. Patiwak prae sida untas yan sang inucap:
 1. Nyupat kaiwangan antuk ngaksama ring krama adat sejroning peparumn]
 2. Nebus antuk arta, akehnya manut ring dedosan sane dados tetegenan saking ngawit.
 3. Nebus antuk dewa danda, maguru piduka ring kayangan desa adat perarem kecutilak.

PAWOS 14

Patiyas utawi olih-olihan prajuru/dulu desa adat kesulurang

- HA. Olih olihan jinah sesantun yadnya desa adat mekadi sarin canang/munggah padruwen desa.
- NA. Etangan olih-olihan ring kayarang desa adat sarin canang pah telu

CA. Ageng alit pah pahan olih-olihan sane keatur ring prajuru dulu desa manut linggih prajuru pengemong pura soang-soang.

PAWOS 15

Prajuru/dulu desa adat kegantosin riantuk

HA. Seda

NA. Kanorayang riantuk iwang pemargi utawi nelar sesana

CA. Sampun dados prajuru masuk 5 warsa

RA. Wit saking pinunas ngeraga

1. Ngenorayang utawi ngentosin prajuru/dulu desa adat patut sejroning paruman tur keingkupin antuk krama adat.

PALET 3

INDIK KULKUL

PAWOS 16, 17

1. Kulkul ring desa adat luire

HA. Kulkul desa

NA. Kulkul banjar

CA. Kulkul seka sekaa

RA. Kulkul pura

2. Tabuh tetepakan kulkul desa

HA. Kalih tulud lambat tedun ngayah

NA. Tigang tulud bulus teteganan kepanca baya

CA. Tigang tulud lambat tetengeran ngerorod

3. Kulkul kelayu sekasan

HA. Tigang tulud lambat tetengeran mitung

NA. Kalih tulud lambat tetengeran nedunang krama pacing ke setra

CA. Kalih tulud lambat tenger nyiram layun

PAWOS 17

4. Kulkul desa adat utawi banjar adat tan wenang ketepak ring wenten kepanca baya
5. Sapa sira uliyan piwal kadi aksara (4) keni denda arta Rp. 100.000 dewa danda prayascita utawi guru piduka
6. Kulkul sekaa-sekaa miwah kulkul pondokan tan kalugra nyawerin tengeran kulkul druwe desa.
7. Prade parun memurub nyawerin tengeran kulkul desa keni denda RP.5.000
8. Ritat kala ngelaksanayang taur kesanga nepak kulkul tengeran mecaru desa adat

PALET 4

INDIK PARUMAN

PAWOS 18, 19

PAWOS 18

1. Paruman ring Desa Adat Bangah Kesulurang
HA. Paruman desa adat patut kewentenan nyabran bude wage
NA. Paruman suang-suang banjar adat lan sangkepan desa manut kabuatan utawi tegak puja wali pelinggih soang-soang.
2. Sangkepan prajuru/ dulu desa. Kewentenan manut kabuatan ritepengan nyanggra paruman guru wisesa lan kabuatan tios.
3. Krama adat sane ngemulatin paruman/sangkepan mangda mabusana adat madya (kwaca, wastra, senteng, destar)
4. Yan krama adat tan setinut/piwal sekadi ring ajeng keni denda siyu rupiah (Rp. 10.000)
5. Sehara pemutus kaut sakayang pisan mangda gilik seguluk briuk sepanggul punika kenaggehang.

PAWOS 19

Tataning paruman kesulurang:

1. Pinih rihin mangda ngarcana ring ida SWH ida Begawan penyarikan meserana cane lan canang sari
2. Ring paruman kadi ring ajeng (pawos 17) bendesa adat nyiaran pemarginya ngenteran desa adat/banjar adat ngenenin indik:

HA. Nunjuk lungsurin pekraman miwah ayah-ayah
 NA. Pemargi, penelas, miwah sulur arta brana druwen desa adat
 CA. Pemargi usaha desa adat sane mabuat.
 RA. Sahana wicara saha pemutus pemutusnya
 KA. Daging perarem miwah pasuaran sane mabuat
 DA. Rencana prajuru/dulu desa indik usaha kerta desa benjang pungkur
 TA. Miwah sane tiosan sane manut ring kawigunanya.

PALET 5

INDIK DRUWEN DESA ADAT / INDIK PURA BALE AGUNG SUNGKUMAN BR. ADAT

PAWOS 20

Padruwen desa adat Bangah sekadi ring sor puniki

HA. Pura puseh lan telajakanny

Sertipikat:

NA. Pura dalem lan telajakanny

Sertipikat:

- Luas 700 M2 29.207 DP –Luas 1650 m2 106 SP 17 -2600 M2
- Luas 800 M2 30. 107 DP- Luas 3600 M2 50 SP 17

CA. Pura bale agung lan telajakanny

Sertipikat:

- Luas 13050 M2 10511 SP
- Luas 3250 M2 57, 14 SP
- Luas 1400 M2 107,21 DP

RA. Tegal suci -

KA. Bale banjar -

DA. Air minum – 500 M x 4 = 2000M

TA. Kayangan lan palemahan sane sampun marupa tetaman saking nguni

SE. Palemahan karang desa

WE. Setra

LE. Mraja pati

PAWOS 21
INDIK PAOLIH-OLIHAN DESA ADAT BANGAH LUIRE

HA. Urunan krama Desa Adat
NA. Pica saking guru wisesa
CA. Paica punia bakti (Dana Punia)
RA. Pah-pahan saking LPD
KA. Air minum
DE. Dedosan
TA. Dana arta saking numbas ayah (Pengoot)
SA. Pah pahan sarin canang (manut pah tiga)

PAWOS 22

1. Pajuru/dulu desa wenang ngentangan druwe desa adat, ritepengan ngindikang pasukertan desa adat.
2. Nyabran pasangkepan desa, prajuru/dulu desa adat ngewentenang parindikan munjuk lungsurin padruwen desa adat ring krama adat.
3. Sake luwiring druwe desa adat patut wenten ilikitanya
4. Tan kalugra ngadol utawi ngesahang padruwen des adat yan tan kesungkemin antuk krama desa adat.

PALET 6
SUKERTA PAMITEGEP

PAWOS 23
KARANG, TEGAL, LAN CARIK

1. Krama adat sane maduwe karang, tegal,lan carik patut ngaryanin wates sisi kaler, miwah sisi kangin sane mewasta gegaleng keluan, sisi keteben mewasta tali kunda, utai ngangge wates pal beton saking paican guru wisesa (BPN)
2. Prade wenten karang kebebeng, mangde keutsahayang wenten pemargi mejimbar sanistiannya 1.20 satu meter 20 senti
3. Sinalih tunggil krama desa adat tan kalugra:

HA. Ngalah margi, tegal, carik lan sekancannya

NA. Ngalah ngalah tanah, tegak kayangan, laba pura, setra lan sekancan genah suci

4. Prade wenten sekadi ring ajeng aksara 3 Na, sane ngalah-ngalah patut

HA. Ngewaliang tanah inucap.

NA. Keni dewa danda mangda ngewaliang sepolah palih tegak kayangan suci manut sastra agama

RA. Keni danda arta merupa jinah prabiya aci upakara

PAWOS 24

PEPAYONAN

1. Ngawit nandur pepayonan tanem tuwuh patut adepa agung 1,5 meter ngejeroang saking watwes, prade jantos ngelintangin wenang sepat gantungan
2. Yening wenten tetanduran ngungkulin semaliha mayahin, kapisaga patut kewara antuk peiguman ping ajeng, prasida sang nruwenang ngebah utawi notor.
3. Prade sampun kewara taler tan wenten usaha sang nruwenang sang rumasa ke tataban wenang mesadok ring prajuru ring prajuru / dulu desa tur sampun keparitatan keluarga nguncalang pepayonan inucap.
4. Sang keni pamidanda penyangaskara saha prabea manut ring wewangunan sane kerubuhin luire:

HA. Sang nruwenang wit sinanggeh mayanin prade pungkut ngerubuhin wewangunan krama tios.

NA. Sang notor, monggol utawi ngerebah taru tur ngerubuhin krama tiyos.
5. Sang sapa sira ugi sinaluh tunggil krama Desa Adat Bangah sane ngentungan kotoran (leluu) tan manut ring genahnya patut sang inucap keni denda arta Rp. 250.000
6. Krama Desa Adat patut ngemanggehan kawerdian telajakanne soang-soang mangde desane dados asri.
7. Krama desa adat patut ngemanggehan kawerdian tanem tuwuh sane ngawinan desane asri lan lestari.

PAWOS 25
WEWANGUNAN

1. Krama adat yaning jagi ngewangun kesulurang:

HA. Yening wewangunan inucap ngenenin wates patut mesadok ring bendesa adat ping ajeng rikala ngewangun.

NA. Ngangge sukat asta bumi miwah asta kosala kosali sanistane manut ring petitis niskala.

CA. Prade ngewangun jantos nyayubin bilih-bilih temboke ring tetangga wates patut kewara tur kesadokang ring prajuru dulu Desa Adat.

RA. Risampun kewara nanging kantul piwal sang nayubin keni denda 100 kg Beras kls II

KA. Tembok utawi sane nyayubin patut kebongkar oleh sang sane nruwenan

2. Sane pacing ngewangun nampek ring wewengkon

HA. Karang suci mangda nganutin bisama PHDI

NA. Yaning piwal ring aksara (Ha) wangunan inucap mangda ke rug.

CA. Yaning wenten krama tios jagi pacing ngewangun paumahan, usaha nampek ring wewidangan karang suci mangde taler nitenin bisama PHDI (500M)

PAWOS 26
WEWALUNGAN

1. Sahanan warga desa adat sane melihara wewalungan luire bawi, banteng, kebo, jaran, kambing, misa miwah ayam lan sapanunggilannya patut sayaga nitenin negul/ngelogor mangda nenten ngerusakin karang utawi peabian krama tios.
2. Sahanan kekotoran sekadi ring ajeng mangda nitenin ngaryanin saluran kekotoran / spail / saluran pembuangan air limbah.
3. Yen janten memelihara wewalungan langkungan-langkungan ring ingon-ingon patut nitenin guru wisesa.
4. Prade wenten wewalungan miwah ayam lan sepenunggalannya sane malumbar utawi ngeleb, tur ngerusakin pekarangan utawi peabian krama tios patut kewara tur keparitetenin olih sang nruwenan mejanten rusak mangda kesadokan majeng dulu desa.

5. Sang madruwe wewalungan utawi ayam lan sepenunggilannya sekadi ring aksara (4) patut keni denda:
6. Prade wenten wewalungan suku pat (bawi, banteng, kebo jaran, kambing lan misa) tiosan ring angge mepepada jantos ngeranjing ring tegak suci (parahyangan) krama sane madruwe wewalungan punika patut.
Keni danda 25kg Beras kelas II, lan upakara manut kadi sastra agama.
7. Prade wenten wewalungan tiosan ring ingon-ingon krama adat ngeranjing sejroning pekarangan wenang ikrama ngupa hayu wewidangan krama adat medasar antuk sastra agama hindu.
8. Asu sane nyegut nganian rabies/ngantos padem keni prabia 100 kg beras kelas II lan keni prebia pengobatan.

PAWOS 27

DUSTA MIWAH BAYA

INDIK DUSTA

1. Sane sinanggeh baya luire:

HA. Jiwa baya upami	: Tabrakan, mesepegan, keni blabar, wangunan puwun lan sepenunggalannya
NA. Arta baya upama	: Kerampokan, kemalingan, lan sepenunggalannya
CA. Geni baya	: Indik baya Panca Geni (baya sangkaning api)
RA. Geni baya	: Umah puun, pura puun, alas puun lan sepenunggalannya.
2. Sahanan warga desa prade uning ring wenten jadma melaksana dusta ring sejroning desa pekraman patut digelis nepak kulkul desane manut ring pasuaran kulkul,ngelantur mesadok majeng prajuru / dulu desa.

INDIK BAYA LAN PENANGKAN BAYA

1. Sane kasinanggeh baya utawi penangkan baya upami ipun

HA. Umah puun, pura puun
NA. Keblabaran toya ageng lan sekancannya
2. Sahanan warga desa sane prade uning ring kewentenan baya utawi penangkan bayane patut:

HA. Atur uning ring prajuru/dulu desa

NA. Patut digelis nepak kulkul manut ring pesuaran kulkul (pesuaran kulkul baya)
Ngelantur mesadok majeng prajuru/dulu desa.

TATANING MESESEREP INDIK DUSTA

1. Krama desa adat sane keicalan utawi kemalingan prade pacang meserep patut nunas panuntun prajuru/dulu desa/krama
2. Prade genah meseserep ngelangkungin desa/banjar setiosan patut nunas wak wakan ring prajuru/dulu desa irika
3. Sang meseserep patut nginutin tata cara utawi dresta sane ketiban olih prajuru/dulu desa irika taler mesadok ring kapolisian.
4. Sahanan krama desa adat prade polih nuduk, barang saha luire patut uningan ring prajuru dulu desa adat
5. Prajuru /dulu desa adat patut nyiaran kewentenan barang inucap
6. Sang sane keicalang patut ngewaliang tur nyiarang dumogi medsar manah bakti tur ngewaliang barang punika ring sane madruwe.
7. Prade tigang sasih tan wenten sane ngelingan barang inucap kedruwang olih sang nuduk, sesampun polih lalugran prajuru/dulu desa.

PAWOS 28

1. Sang manggihin kehanan arta baya patut ngukul tur atur piuning ring prajuru /dulu desa adat.
2. Prade wenten jatma memaling barang sinanggeh genah suci keni danda 500kg Beras kelas II
Lan Upakara manut sastra agama hindu tur ngewaliang barang.
3. Pratingkahe mapailon ring maling kebawos saruron (meseka) danda 500kg Beras kelas II
4. Prade wenten krama desa adat sane manggihan maling tur nenten nyadokan patut keni danda 500kg Beras kelas II kadi dandaning maling
5. Sang inucap sekadi ring ajeng aksara 3,4 keni danda dandaning maling

PAWOS 29
PENYANGGRA DESA/BANJAR ADAT

TATANING NYANGGRA

1. Desa Adat Bangah wenang ngemnggehang tata cara nyanggra pekaryan karma adat.
2. Pekaryan sane patut kasukserahang ring penyanggra krama adat luire
HA. Upekara Dewa Yadnya lan sesananya
NA. Sahanan pengabenan/pitra yadnya
CA. Dewa yadnya
RA. Buta yadnya/balik sumpah
3. Pekaryan sane kengin katunasan penyanggra ring desa/banjar adat inggih punika panca yadnya
4. Yening ikrama jagi ngelaksanayang pekaryan suka indik bebakta oleh ikrama inggih punika
HA. Krama lanang wantah merupa jinah Rp.25.000
NA. Krama istrinya beras 2kg, jinah Rp 20.000, polih pengewales isin sok 6 (nem)
CA. Ritatkala kalayu sekaran regu sane polih amongan,istrinyane makta beras 1 kg ,sarin kwangen Rp 10.000

INDIK DEWA YADNYA

PAWOS 30, 31,

1. Krama pengemong/pengempon Desa Adat Bangah luire
HA. Pura Bale Agung
NA. Pura Puseh
CA. Pura Dalem Bangah, abian luang
RA. Pura Melanting bangah, abian luang
KA. Pura Mrajapati bangah, abian luang
DA. Pura Tegal Suci bangah, abian luang
TA. Pura Arak Api
SA. Pura Alas Arum
WE. Pura Natar Sari
LE. Pura Beratan

MA. Pura Panti

NGA. Pura Subak/Bedugul Carik

2. Pengaci ring Pura inucap manut sastra agama hindu kemargiang alit, agung dedonnonan alit.

HA. Upekara munggah ring surya inggih punika suci asoroh sesagian lantasan putih kuning, dewa dewi

Sor surya : gelar kesanga, penimpung, segehan agung

Panggungan : soran pitu, suci 2 soroh. Soroan dapetan, kojong natengan tegak linggih asoroh sesayut bebangkit, pragemal, sekartaman, jangan, teteg sekar kedaton, sesagian, soda songo

Gedong : soroan 3 sesagian, canang pengraos, soda

Bale dawa : soroan 3, kojong rantengan tegak linggih jerimpen

Paruman : soroan 7, kojong retangan, tegak linggih, suci

Netegan : Prasdaksina pejati, prayunan

Meru : suci 2 soroh, dapetan 3 canang pengraos, sesagian, canang burat wangi, tegak linggih.

PAWOS 31

1. Ring Pura Kahyangan Tiga patut kewentenang pemangku

2. Ngemadegab pemangku manut dedonon:

HA. Nyanjan matengeran antuk ida betara nyelang pedasaran tur medsar antuk pepintonan meserana geni, pasepan, toya ning, abu (aspal)

NA. Katurunan utawi ngewaris medasar antuk sang kemadegang risampun sumanggup keadegang.

CA. Kacatri mapiteges : kapilih olih krama medasar antuk bawos briyuk sepanggul

RA. Yening mangku lanang kelayu sekaran, mangku istri ngelanturang ayah-ayah ring amongan kewantu olih pemangku sane tiosan.

3. Tan wenang anggen pemangku luwire

HA. Cendangga luih ipun, peceng, perot, cungh, lan sepenunganya

NA. Sakit ila luih ipun, ayan, buduh, aids, sakit menaun (gering)

CA. Ngelaksanayang

- Gama gemana inggih punika mawiwaha sareng semeton, kemanggehang purusa
- Para dara inggih punika sane mederbe selir
- Sang sane sampun pernah ngelebar gelung

PAWOS 32

SWADARMANING PEMANGKU LUIRE

- HA. Ngelola pala sraya kengin rauh ring pedudusan alit
- NA. Ritepengan ngenterang yadnya patut mabusana nganutin ketentuan sangkul putih, rambut wenang agotra, medestar anyondong (bongkus oong)
- CA. Pemangku mangda ngutamayang ngokasan yadnya ring sejroning Desa Adat Bangah
- KA. Sesana pemangku luire : manut kadi kesatuan tapsir mangde magelar antuk lontar kusuma dewa lan sangkul putih.
- DA. Nyumuka yakni angwikon awaknya dawak ke dandan antuk nyapuh raga tur kesulurang ring sesana krama adat.
- TA. Tan kedadusan ngerangkep, (nyenteng)
- SA. Dados ngemargiang aci mebebangkit
- WA. Tan dados ngewaliang kojong
- LA. Yening polih oleman, mangde pemangku lanang istri ngerauhin oleman inucap.

PAWOS 33

PETIAS UTAWI OLIH-OLIHAN PEMANGKU:

1. Pah tiga miwah sarin canang soang-soang pura amongan
2. Sasidan sarin canang soang-soang pakubon paumahan krama
 - Yadnya metaman pragembal
 - Banten akepa mepiya mesarma Rp. 50.000
 - Sesantun penyolasan mesarma Rp. 100.000
3. Yan yadnyane tan mesekartaman
 - Banten arepa mapuja mesarma Rp. 50.000
 - Sesantun penyolasan mesarma Rp. 100.000

PAWOS 34
NGUWUSAN PEMANGKU

1. Yan pinunas ngeraga
HA. Pemangku inucap mangda mamitang raga ring kayangan maserana daksine pejati
NA. Mangku inucap atur supekta ring prajuru gumanti prajuru matilar ring linggih Desa adat.
2. Yan kawusan riantuk memandel
HA. Pemangku inucap mamitang raga ring kayangan meserana daksina pejati
NA. Ngewaliang prebiya pewentenan ring krama pengarga jinah penelasan pewentwn inucap
CA. Kedanda arta akwintal beras kelas I

PAWOS 35

A) KASUKERTAN KAYANGAN

1. Tan kengin ngeranjing ke pelinggih (pura) yan katiban catur cuntaka luire:
HA. Sebel riantuk ngamedalan rah (kotor kain) suwe ipun : jantos sang sebel mersihin raga
NA. Sebel ngembasan putra suwen ipun:
 - Lanangne ngantos kepus pungsed
 - Istrine ngantos tigang sasih 42 rahinaCA. Sebel riantuk keruron jantos 42 rahina
RA. Sebel pawiwahan jantos metirta widhi widana
KA. Sebel Gamia Gemana jantos kepalasang tur maprabia ring desa adat
DA. Sebel riantuk salah timpal jantos kepalasang tur maprabia ring desa adat
TA. Sebel riantuk anak bajang mobot jantos kapuputan mawidi widana
SE. Sebel riantuk ngelaksanayang mamitra ngalang nyantos keprayascita
WA. Sebel kepadaman jantos ngaturang pengembak desa adat
LA. Yan wenten piwal patut ke danda antuk ngaturang pabersihan manut ring upekara agama kepastikan olih prajuru adat.
MA. Sebel manut sastra agama sane menggah ring kesatuan tapsir agama.
2. Barang sinanggeh sebel leteh manut agama luire:

Tulang manusa, tanah sema, lan serana sane mange ring genahe ring setra sane manurung keni danda (LA).

3. Sato ngeranjing kekayaan, sane moderbe sato inucap kedanda pateh sekadi aksar (LA)
4. Yan wenten sawa ring kayangan patut kayangan inucap ke widhi widana saha ke buta yadna antuk ma kelup katuna san ring sang silinggih.

B) Pratingkahe tan wenang ring pura luire:

HA. Ring sahana wak purusa (mekemuh, mamisuh, mamacin keni danda prayascita, bio kaonan)

NA. Masusuin anak alit keni danda, prayascita, bio kaonan

CA. Ngambahan rambut, miwah ngelukar busana, keni danda prayascita, bio kaonan

RA. Mungguh tedun ring pelinggih tansangkaning peduduk prajuru desa adat kedanda antuk

prayascita/bio kaonan

KA. Ngawi-ngawi dados dasaran, keni dewa danda.

C) Sotaning ngeranjing ke pura mangda mabusana sanistane busana madya luire:

Busana Lanang

1. Kuwace
2. Destar
3. Kampuh
4. Kain panjang
5. Selempod

Busana Istri

1. Kuwaca
2. Wastra
3. Sesenteng
4. Sabuk/pepelet
5. Dandahan rambut

PAWOS 36

1. Sinalih tunggil kayangan keni baya (arta baya) wenang pemangku atur supaksa ring prajuru kelanturang olih dulu desa mangda nitenin indik arta baya punika.
2. Prajuru patut wenten atur ring desa jaga muputang ring inggian ngupekara kayangan selaminye asasih inucap ngelantur katunasang ring sang sulinggih.

PAWOS 37

INDIK RSI YADNYA

1. Sang pacang madeg Pandita utawi Pinandita, Balia Sonteng, Dalang, mangda wenten atur supaksa ring prajuru 3 rahina sadurung ngambil pekarya.

2. Prajuru mangda nitenin pemargi yadnya inucap tur patut ngalangin yan wenten sesanan ipun ring dresta.
3. Krama adat mangda mapunia
4. Mangda kesaksi oleh PHDI Desa

PAWOS 38

INDIK PITRA YADNYA

A. Penyanggra miwah pengambil karya yadnya sekadi ring sor:

Padewasan:

1. Suang-suang krama sane jaga ngambil pakaryan pitra yadnya pengabenan mangda atur supaksa ring prajuru adat.
2. Silih sinunggil krama adat sane ngambil pekaryan pitra yadnya mangda nganutin ala ayuning dewasa manut pewarigan
3. Tata cara ngeplugin mangda kelaksanayang 3 rahina selang pekaryan pitra yadnya kelaksanyang pengupekara sang kelaya sekarang antuk megeseng luire:

HA. Sawa wedana

NA. Swasta

CA. Ngelungah, nyapuh, warak langkir

- Ngelungahang yusa anak alit 42 rahina
- Nyapuh yusa anak alit 12 rahina
- Warak langkir ngumlan rah, kadi keroron

Pemargin yadnya inucap jantos puput munggah daun bingin mangda kapuput oleh sang sulinggih (sarwa sadaka)

1. Soang-soang krama adat sane ngelaksanayang upekara pitra yadnya krama patus akehnya Rp. 10.000
2. Ritatkala krama adat ngelaksanyang pengeritan ikrama patut kani patus akehnya 15 kg beras kelas II
 - Tying
3. Prade wenten kelayu sekarang ring soang-soang wewidangan banjar adat, magda kesungkemin olih banjar adat soang-soang
4. Indik kecuntakan nganutin ring wewidangannya
5. Tios ring wewidangan banjar adat wenten ngelaksanayang dewa yadnya, sekancan upekara dewa yadnya tan kepatutan.

6. Yan soang-soang banjar adat wenten ngelaksanyang dewa yadnya ane padem patut kesirepan nyantos upekarane puput ring desa.
7. Ritat kala ikrama desa adat ngelaksanayang pitra yadnya inggian pinunas tirta ring pura dalem lan praja pati mangda ngaturang suci 2 soroh lan prasdaksina 2 soroh.
8. Ritat kala ikrama adat mreteka sang pemangku ikrama patut keni patus akehnya. Sami prahara/nistahing utama (prahawa madya)
9. Prade wenten puja wali jagat (galungan, kuningan, nyepi) wenten kelayu sekaran/kacuntakan patuh kesirepan (kesekeh nyantos dewasa indik ikrama adat wantah polih reguan.
10. Tan kalugra ritat kala ngelaksanayang ngaben ngewarsa tan kengin nyimpang sawane kesuang-suang paumahan
11. Ritat kala ngelaksanayang ngaben ngerit patut kesungkemin tur keenter oleh bendesa adat/dulu desa kelian adat.
12. Yan prade ngewentenan ngerit patut nebus sang sane kewangun ring pura dalem lan mraja pati, upakarnya suci 2 soroh, prasdaksina 3 soroh, penebusan asoroh, pengulapan asoroh lan biokaonan prayascita, salaran bebek, siap. Ayam penebus tegen-tegenan kelanturang antuk soda putih kuning rarapan tipat pesor pamopog.
13. Krama adat patut ngerombo ngaryanin karya inucap nyantos puput
14. Yening langkung ring punika apatut manut semaya surup surya ngelanus
15. Pebersihan kemargiang olih sang sane mederbe karya pitra yadnya. Prabiya upekara ketegen olih sang madue karya. Upekaranya, prascita, pengulapan pebersihan, caru ayam brumbun ring pura nunas tirta kasiratin tirta pengening ngening inucap ring Desa Adat Bangah.
16. Seurah arih ngelaksanayang upekara pitra yadnya Desa Adat Bangah kangkat ngelanus indik nyekah manut ida sang muput ngenjek 12 rahina sedurung punik ngembak desa indik upekaranya: prasdaksina, pebersihan, bio kaonan, soroan alit 4 soroh, daksina 4 soroh
17. Munggwing penyanggra sang madue karya, majeng ring ikrama adat, polih pesangu. Ngantos ring nyanggra seka sekaa.
18. Sang sane ngelaksanayang karya pitra yadnya mangda ngaryanang banten pengerebuan kegenahan cangkem setra.
19. Riwus puput karya pitra yadnya patut ngelaksanayang nyegara gunung.
20. Yan prade wenten padem salah pati, ulun pati, paem ring pagenahan tan wenten uning dados keadenan nanging upakara penebus mangda kategepini.

HA. Ring perempatan/catus pata banjar adat

NA. Ring peteluan

CA. Ring cangkem setra

RA. Ring genah padem

21. Krama Desa Adat Bangah patut ngemargiang upakara pitra yadnya **sawa pranawa** ritatkala pemangku lanang / istri kelayu sekaran.

B. Antuk mendem

1. Suang-suang krama adat nedunin keni patus akehnya:
 - Jinah (10.000)
2. Patus punika keatur ngawit ipun atur supaksa padem ke pendem ngantos galah 12 rahina
3. Prade pedem ring dura desa, dura Negara medasar antuk deduhan prajuru adat/arahan arah nyarahan.
4. Yan wenten I krma nenten naur patut keni 12 H double
5. Ring pagebagan tan kalugra ngicen mangan, kinum, rook
6. Krama adat nganter kesetra mabusana kelayu sekaran nyantos nunas pebersihan, pengerebuan
7. Tan kalugra mendem sawa rikala: semut sedulur, kala gotongan, ingkel wong, pasha, purnama, tilem, purwani, was penganten, tegak piodalan lan sepenunggalnya
8. Indik penanaman sawa:

Yan wenten kelayu sekaran sane ketanem patut ngemargiang toya pengentas pekinsan saking surya suang-suang tirta sanggah, merjan, pura dalem, mraja pati upekaryanya:
9. Indik pengembak desa ring 3 rahina, patut kewentenang ring pakubon sang sane madue kelayu sekaran, indik mecaru 12 rahina, ikrama adat makta aneman ring paumahan sang kelayu sekaran.

PAWOS 39

INDIK MANUSA YADNYA

Dedudonan upeacara manusa yadnya kadi ring sor sane patut kelaksanayang:

1. Megedong-gedongan kelaksanayang duk ngerempini ibiang tetujonne mabersih mangda inak rahayu

2. Upekara embas putra, tetujone matur suksma sana angayu bagia ring ida sang hyang widhi wasa
3. Upekara kapus wudel, tetujone mabersih ring pakubon (ring sejroning wewangunan)
4. Upekara ngelepas hawon (12 rahina) pabersihan ianak saremh ibiang
5. Upekara kambuhan (42 rahina) mebersih sane ngewaliang nyama bajang ianak luire:
 - Bajang colong, bajang yeh, bajang ambengan, bajang lengis, bajang bukal, bajang tukad, bajang padan, bajang dodot.
6. Upekara tigang sasih, nunas wara nugraha ring ibu pertiwi
7. Upekara enem sasih (1 oton) pabersihan siwa dwara
8. Ngempugin, tatujonne mangda tumbuh otonya mangda becik
9. Upekara tumbuh gigi, nunas tirta ring Ida Betara Surya Brahma lan Dewi Sri
10. Upekara meketus, ngawitin natab biokala
11. Upekara ngraja sula, ngraja singa nunas ring ida hyang sama ratih, ring hyang kama jaya
12. Upekara metatah, ngirangin natab sad ripu
13. Upekara wiwaha, pabersihan suka swanita (bibit kama bang kama petak)
14. Upekara pawintenan, nunas wara nugraha jaga nincap kedyatmika

PAWOS 40

INDIK BUTA YADNYA

1. Eka sata inolah winangun urip manut kadi sato inucap
2. Panca sata inolah winangun urip:

HA. Ayam putih ketengannya	5
NA. Ayam biying ketengannya	9
CA. Ayam bulujalak ketengannya	7
RA. Ayam ireng ketengannya	4
KA. Ayam brumbun ketengannya	8
3. Panca sanak (wraspati kalpa) karangan soang-soang inolah winangun urip dasarnya panca sata kawuwuhin bebek bulu sikep ketengannya 88 tanding
4. Rsi gana inolah winangun urip dasarnya panca sata kawuwuhin bebek putih inolah dados 9 olahan
5. Panca kelud : winangun urip dasarnya panca sata kawuwuhin bebek belang kalung, asu bangbungkem, kucit butuhan , bebek belang kalung ketengannya 33, asu belang bungkem 33 kambing ketengannya 44 lan kucit butuhan ketengannya 88.

6. Tawur kesanga: kelaksanayang ritat kala pengrupukan ring perempatan agung, upekaranya luire:
 - HA. Ageng : Caru panca sata, banteng ketenganya 99 segehan agung
 - NA. Alit : Caru panca sata, segehan agung bebek belang kalung lan sejangkepnya galah masa jam 18.30 sandi kala.
7. Ring kulawarga/pakubon
 - HA. Pemrajan/sangghah mengharturkan pers, ajuman, daksina ketipat kelan, canang wangi burat wangi, nunas tirta bija beras kuning
 - NA. Natah mrajan /sangghah ngaturan segehan manca warna 9 tanding
 - CA. Dijaba umah/lebuah pintu masuk halaman ngangge sangghah cucuk upekara daksina ajuman putih kuning ring sor ne ngaturang segehan manca warna 9 tanding olahan ayam brumbun lan tetabuhan katur ring sang buta raja, kala raga, segehan cacah 108 ulamnya jejeron matah medaging segehan agung sari atanding, katur ring sang buta kala bala, ring natah paumahan ngaturang sgehan manca warna 5 tanding
 - RA. Risampunen wusan ngaturan segehan nawur/pecaruan mangdane kalugra sareng sami sane sampun anom ring sajroning kulawarga soang-soang mabiyakalan prayascita mangdane natab sayut ring natah paumahan. Wus nagturang tawur utawi caru lan sesampune mabya kala ring galah sandikala mangda ngelaksanayang pengrupukan ring paumahn soang-soang ring desa adat ngewanten obor-obor api bunyi-bunyian kulkul tanda trapti.
 - KA. Sapa sira ugi sane ngadol arak antuk kinuman kewewidangan banjar sejebag desa adat bangah jaga kadanda akehnya: 100kg beras kelas II rikala nyepi/pengrupukan.
 - DA. Sane kinum nyantos mabuk (mada) lan nyantos ngawinan biota kedanda akehnya: 150 kg beras kelas II
8. Nyepi / sipeng
 - Nyepi/sipeng kelaksanayang ring pinanggal ping 1 (siki) sasih kedasa ngawit saking jam 06.00 wita dauh 06.00 benjangan mangda ngelaksanayang catur brata penyepian inggih punika:
 - HA. Amati geni tan kangkat ma api-api
 - NA. Amati karya tan ngelaksanayang pekaryan
 - CA. Amati lelungan tan kangkat melelungan
 - RA. Amati lelanguan, tan kangkat melila cita (ngibur)

KA. Ngembak geni katengerin antuk suara kulkul tur ngewentenan sima krama (darma santi)

PANCA MAS SARGA

SUKERTA TATA PAWONGAN

PALET 1

PAWOS 41

INDIK PAWIWAHAN

I. Pawiwahan inggih punika : patemoning purusa pradana melarapan penunggalan kayun suka cita kedulurin upesaksi sekala niskala.

HA. Pepandikan manggalaning antuk pakrunan

NA. Ngerorod merangkat riyin wawu kekrunayang

CA. Nyeburin utawi nyentana (pepetasan) nyeburin risampun kemanggala antuk upeacara pemerasan

Pidabdab sang pacing mawiwaha patut:

HA. Sampun manggeh daha teruna

NA. Sangkaning pada lila (tan kepaksa)

CA. Ring sang antene mekekalih sedurung mayusa 17 warsa prajuru tan kengin nyaksinin lan ngelingga tangan ilikita inucap

- Pemargin pawiwahan mangda nganutin undang-undang saking ngawewenang (UU No.1 tahun 1974)

II . 1. Pawiwahan sane kepatutan ring desa adat sekadi ring sor

HA. Sampun kemargiang pekalan kalan utawi pesakapan kesaksini antuk tri upasaksi inggih punika manusa saksi, buta saksi, dewa saksi.

NA. Prajuru patut mapekeingang utawi ngilikityang pawiwahan krama adat

2 . Pawiwahan sane tan manut kadi ring ajeng sinaggeh tan pastika (sah)

III. Tata caraning perabian

1) Sapa sira ugi pacang mepewarangan patut mesadok ring prajuru, selanjutnya prajuru maritatasang, manut tan manut indik perabianne.

2) Pemargin pepadikan manut dedunonan:

HA. Pakrunan jantos pang tiga, saha soang-soang melarapan:

1. Kapertama pakrunan

2. Kaping kalih antuk sedahwoh
 3. Ping tiga antuk tipat bantal kebawos pamuput pepandikan
- NA. Risampun mepragat raris sang istri ke ajak budal ring pakubon yang lanang.
sana kelanturang rangkat antuk pabyokaonan/biakala
- CA. Mangda puput tuntas skala niskala pabyokaonan/biakala
- 3) Prade ngerorod utawi merangkat patut:
- HA. Rerama lanang ngewentenan pengelukuan/pejati antuk duta saksi paling kedik 2 (kalih) diri
- NA. Genah antene tan kengin ring pakubon sang lanang sedereng mabyakala
- CA. Sajroning kawentenan natasang ring kulawarga pradana mangda atur supeksa ring prajuru tur prajuru nudonan separindik pintas inggih punika
1. Wantah asiki sane kepatutang maritatas kagenah ngerorodan
 2. Sane tatasan tan kedadosang ketemu ring anten sane wadon
- 4) Sejroning pakrunan / pengelukuan patut
- HA. Kemanggala saking guru rupaka purusa antuk geng pengampura majeng ring guru rupaka wadon
- NA. Kagumang bawos indik-indik panunas utawi pategayan arep ring pasuwakan sang nunas saha dewasa pekrabkambe nyane wekas
- CA. Kacihnayang indik kapurusa utawi pade sentana rajeg kajejerang kepatutan ngidih anak lanang sane kebaos pawiwahan nyeburin, tur risampun duur pemersan kategepin kemanggehan sentana nyeburi
- RA. Prade tan teruna pengelukuan pejati, tan ketrima pakruna kemargiang jantos ping tiga.
- 5) Pekrabkambean mapiteges upekara galang apadang (patut) pamikuren duwaning sampun manut sekadi dedudonannyane manut sastra sagama lan dresta.

PALET 2

INDIK NYAPIAN/BIAT

PAWOS 42

- 1) Pawiwahan prasida kawusang melarapan antuk palas merabian utawi mepademan
- 2) Wusan mapikuren riantukan salah sinunggul lina mapites balu, mekadi balu lanang, balu istri
- 3) Palas merabian inggih punika sangkaning mawiwit wicara

- 4) Sang ayat palas merabian patut atur supekta pailikita riyin ring sang rumawos (pengaduan negeri) watu nisan apadang pemutus kebawos nyaplan, wawu prajuru desa nyiarang kewentenanny ring des asana keni pamelin kulkul antuk beras 1 kwintal beras kelas II
- 5) Tata cara palas merabian sekadi ring sor puniki
 - HA. Nawur prabaya pesaksi pada matenga
 - NA. Panguna kaya polih pah pahan
 - CA. pebekel, arta tatadan soang-soang niri-niri indik wadusan kekuasaang olih purusa, sane nyeburin mewali sang wadon/padruwen tengah idane
 - RA. Ngaweruhin miwah ngupa jiwa perti sentana manut swedarmaning guru rupaka
 - KA. Nawur padanda krama adat 1 kwintal, 2 kwintal
 - DA. Ngewaliang base, ngelung jinah bolong manut prajuru desa lan meduluran antuk swalapatra.
 - TA. Mabaat saking mrajan sang purusa
- 6) Prade wekas sang palas kecihna adung malih patut
 - HA. Ngemargiang pawiwahan malih
 - NA. Kedanda akwintal beras kelas II saking palase
- 7) Sang balu kabinayang dados
 - HA. Balu luh wit sentana (sentana rajeg) miwah balu luh buya sentana
 - NA. Balu muani kapurusan (wit sentana) miwah balu muani nyeburin (boya sentana)
- 8) Swadarmaning balu inucap patut
 - HA. Ngemanggehan pati brata tan patut ngemargiang pada dara/dрати krama
 - NA. Nguwasayang waris, guna kaya tan dados ngadol, nagdeang, makidihan lan siyos punika sejawaning sakeng pianak utawi kulawarga tampak rabine prade okane kanton alit-alit.
 - CA. Kengin ngidih sentana prade kecumponin antuk kulawarga keputusan
 - RA. Kawenangan mawiwahan malih, prade wenten kebebasan saking warga purusa
- 9) Balu ka ucap tan pageh sekadi ring sor puniki:
 - HA. Drati krama utawi para dara
 - NA. Matilar saking pakubon tan pesadok jantos enam sasih
 - CA. Lempas ring swadarma sewosan tan prasida ngehehin solah maprewerti marep ring pituduh kulawarga purusa.

PALET 3
INDIK SENTANA
PAWOS 43

1. Sentana wenten kalih pawos, sane kaucap perti sentana miwah peperasan.
2. Prati sentana inggih punika sentana sane metu saking pawiwahan ke purusa
3. Prade pawiwahan tan ngewetuang sentana nengin ngidih sentana antuk upesaksi sekala niskala sane kewastani sentana peperasan
4. Prade pawiwahan tan kepatut ngewetuang sentana mangda tan kanton kewastaning bebinjat utawi astra kemanggala antuk penyangaskara
5. Sentana rajeng inggih punika, prati sentana wadon (pradana) sane ngemanggehan lanang (purusa) tur risampun ngelaksanayang pawiwahan nyeburin.
6. Sang sane kearsayang sentana rajeng inucap wiwit N0. 5 inggih punika
HA. Prati sentana wadon tunggal utawi silih tunggil prati sentana wadon yening makasami pawakan wadon.
NA. Sampun kemanggehan dados prati sentana (purusa)
CA. Kapiwahan keceburin, keutamayang antuk jadma sane meagama hindu utawi agama sios sane sampun suda wadani (pamarisuda sentana wadon)
7. Ngemanggehan sentana manut dudonan patut makacihna arta berana pemerasan sane kesaksiang sekala niskala
8. Sapa sira ugi pacang ngidih sentana, patut mesadok ring prajuru adat soang-soang bendesa adat sedereng pemerasan
9. Bendesa adat kewakilin antuk kelian adat patut nyiaran krama sane memeras sentana ring krama adat.
10. Prajuru /dulu desa digelis mawosin saha ngicenin pemuwus nepek ring catur dresta miwah perarem
11. Prade sulur peperasan tan manut ring kecaping ring ajeng prajuru/dulu desa adat wenang ngandeg sang pacang mekarya saha ngicenin pemutus mangda kapuputan riya bawos sulur miwah wicaryanya.
12. Peperasan sane patut ring desa risampun makacihna
HA. Widhi widana pemerasan
NA. Kesaksinin antuk prajuru desa sane mapekelingan utawi sane ngilikitayang
CA. Kasiran ring wewidangan desane

13. Sane kepatut peras angge sentana kadi ring sor
 - HA. Jatma sane meagama hindu
 - NA. kulawarga saking purusa prade tan wenten kengin saking wadon yaning taler tan wenten kengin sekama kama (sekita kayun)
 - CA. Keutamayang saking waris pancer purusa.
 - RA. Sinalih tunggil mawiwit saking kulawarga tunggal sanggah utawi meraja, paibon, dadia utawi ngambil sake wenten meagama hindu.
14. Kengin ngangkat sentana langkung ring adiri lanang wiadin wadon.

PALET 4
INDIK WARISAN
PAWOS 44

1. Warisan inggih punika arta, berana saha ayahan ngupadi sukerta sekala niskala saking leluhurnya marepring keturunannya.
2. Ikang sinanggeh warisan luwire:
 - Ha. Due tengah mekadi tegal ayahan desa, sanggah, mrajan, pusaka lan sane siosan.
 - Ha. Panguna kaya, tadtadan/jiwa dana hutang piutang
3. Wawu kengin kebawos warisan prade wenten
 - Ha. Sang ngewarisang
 - Ha. Keturunan (ahli waris)
 - Ca. Arta brana, teteganan (ayah-ayah) makacihna warisan
4. Sane patut ngewaris luwire
 - Ha. Perti sentana purwa/purusa
 - Na. Perti sentana (sentana rajeg)
 - Ca. Sentana peperasan lanang/wadon
5. Prade tan wenten sekadi ring ajeng/kang sinanggeh ngewaris:
 - Ha. Turunan purusa, pernah ngunggahang mekadi rerama lanag, pekak selanturnya rerama misan mindon.
 - Na. Turunan purusa, pernah kesamping mekadi keponakan keponakan di misan miwah keponakan di mindon.
6. Swadarma ring nguwaris patut:

- Ha. Nerima saha nguwasayang tetamian pahan keturunannya. Mekadi ngempon sanggah, merajan pura, panti saha penguna kaya miwah ayah ayah pewaris.
- Na. Ngabenan pewaris saha ngelanturang upekara ngaben/pitra yadnya
- Ca. Naurin utang utang pewaris manut pengelogika.
7. Mangda kecihna paparem puniki kapikukuh olih Krama Adat Bangah sejawaning lingga tangan inucap ring ajeng paparem puniki patut medaging lepihan (lampiran) lingga tangga, kram abanjar sejebag desa adat bangah.
8. Daging pararem sane tan manggeh unteng unteng makadi indik agung alit sasalahan etangan jinah, kangin kelanturang ring aem jagate sekadi mangkin.

ASTAMA SARGAH PAMUPUT

1. Saluwir kabuatan Desa Adat Bangah sane durung manggeh ring perarem puniki pacang kejangkepin ring lepihan-lepihan.
2. Perarem puniki puput tur kaparisuda lumaksana ring rahina sane ketetepang olih paruman lan perarem Krama Desa Adat Bangah.

Lepihan :

1. Nemonin sasih ka 6 (enam) Krama Desa Adat Bangah Ngaturang segehan selem ring ulun desa, segehan brumbun ring pempatan, segehan barak ring mangkalan, keruntutin antuk segehan agung. kemargiang tigang kliwon, wus punika ngatukang ring tegal suci nemonin tilem ke 6 (enam) antuk tipat pesor lan nunas tirta ring Tri Kayangan.
2. Ritatkala nemonin tumpek landep, krama Desa Adat Bangah nunas tirta pemuput ring Pura Arak Api (Ritatkala Piodalan Memargi)
3. Ring wewidangan Desa Adat Bangah ten dados mebedilan lan mancing malam
4. Ring wewidangan Desa Adat Bangah ten dados mortas, nyetrum, nyuluh, meboros lan menembak burung, sane melanggar kedenda 50kg Beras kelas II.

Bendesa Adat Bangah



I Made Sumadika

Bangah, 22 Maret 2020

Penyarikan



I Ketut Sudarta